



Philippine Biblical Worldview Institute

Certificate in Biblical Studies

CBS1100 Efeso to 2 Timoteo

Conrad Jun Tolosa

CBS1105 2 Tesalonica

1 Mula kina Pablo, Silas, at Timoteo—

Para sa iglesya sa Tesalonica, na nasa Diyos na ating Ama at nasa Panginoong Jesu-Cristo.

²Sumainyo nawa ang kagandahang-loob at ang kapayapaang mula sa [ating]^[a] Diyos Ama at sa Panginoong Jesu-Cristo.

Ang Paghuhukom

³Mga kapatid, tama lamang na kami'y laging magpasalamat sa Diyos dahil sa inyo, sapagkat patuloy na lumalago ang inyong pananampalataya kay Cristo at lalong nagiging maalab ang inyong pagmamahalan sa isa't isa. ⁴Kaya nga, ipinagmamalaki namin kayo sa lahat ng mga iglesya ng Diyos dahil sa inyong pagtitiis at pananampalataya, sa gitna ng mga pag-uusig at mga kahirapang dinaranas ninyo.

⁵Ang lahat ng ito'y nagpapatunay na makatarungan ang paghatol ng Diyos, upang gawin niya kayong karapat-dapat sa kanyang kaharian na siyang dahilan ng inyong pagtitiis. ⁶Gagawin ng Diyos ang nararapat; tiyak na pahihirapan niya ang mga nagpapahirap sa inyo. ⁷Kayo namang mga nagtitiis ay aaliwin niyang kasama namin kapag ang Panginoong Jesus ay inihayag na mula sa langit kasama ang kanyang mga makapangyarihang anghel, ⁸na may naglalagablab na apoy. Parurusahan ang lahat ng hindi kumikilala sa Diyos at hindi sumusunod sa Magandang Balita ng Panginoong Jesus. ⁹Magdurusa sila ng walang hanggang kapahamakan at mahihiwalay sila sa Panginoon at sa dakila niyang kapangyarihan. ¹⁰Mangyayari ito sa Araw ng kanyang pagparito upang tumanggap ng papuri mula sa kanyang mga hinirang at ng parangal ng lahat ng sumasampalataya sa kanya. Kabilang kayo roon sapagkat sinampalatayanan ninyo ang patotoong ipinahayag namin sa inyo. ¹¹Dahil dito, lagi namin kayong idinadalangin sa Diyos, na nawa'y maging karapat-dapat kayo sa pagkatawag niya sa inyo. At sa pamamagitan ng kanyang kapangyarihan, nawa'y ipagkaloob niya sa inyo ang lahat ng mabuti ninyong hinahangad, at maging ganap ang inyong mga gawaing ibinunga ng pananampalataya. ¹²Sa gayon, mapaparangalan ninyo ang pangalan ng ating Panginoong Jesus, at kayo naman ay pararangalan din niya, ayon sa kagandahang-loob ng Diyos at ng ating Panginoong Jesu-Cristo.

Ang Suwail

2 Mga kapatid, tungkol naman sa pagbabalik ng ating Panginoong Jesu-Cristo at sa pagtitipon sa atin upang makapiling niya, nakikiusap kami sa inyo ²na huwag agad magugulo ang inyong isipan o mababahala kung mabalitaan ninyong dumating na ang Araw ng Panginoon. Huwag kayong maniniwala kahit sabihin pa nilang iyon ay pangangaral o pahayag, o isinulat namin. ³Huwag kayong magpapadaya kaninuman sa anumang paraan. Hindi darating ang Araw ng Panginoon hangga't di pa nagaganap ang huling paghihimagsik laban sa Diyos at ang paglitaw ng Suwail^[a] na itinakda sa

kapahamakan.^[b] ⁴Itataas niya ang kanyang sarili at kakalabanin ang lahat ng kinikilalang diyos at sinasamba ng mga tao. Uupo siya sa Templo ng Diyos at magpapakilalang siya ang Diyos.

⁵Hindi ba ninyo natatandaan? Sinabi ko na ito sa inyo nang ako'y kasama pa ninyo. ⁶Hindi pa nga lamang nangyayari ito dahil may pumipigil pa, at alam ninyo kung ano iyon. Lilitaw ang Suwail pagdating ng takdang panahon. ⁷Ngayon pa man ay gumagawa na ang hiwaga ng kasamaan at mananatiling ganyan hangga't di naalis ang humahadlang sa kanya. Kung maalis na ang humahadlang, ⁸malalantad na ang Suwail. Ngunit pagdating ng Panginoong [Jesus],^[c] papatayin niya ang Suwail. Bubugahan niya ito ng hininga mula sa kanyang bibig at pupuksain sa pamamagitan ng kanyang nakakasilaw na liwanag.

⁹Paglitaw ng Suwail, taglay niya ang kapangyarihan ni Satanas. Gagawa siya ng lahat ng uri ng mapanlinlang na mga himala at kababalaghan. ¹⁰Gagamit siya ng lahat ng uri ng pandaraya sa mga mapapahamak dahil ayaw nilang mahalín ang katotohanan na makakapagligtas sana sa kanila. ¹¹Dahil dito, hahayaan ng Diyos na sila'y malinlang ng espiritu ng kamalian at maniwala sa kasinungalingan. ¹²Sa gayon, mapaparusahan ang lahat ng natuwa sa paggawa ng kasamaan sa halip na maniwala sa katotohanan.

Hinirang Upang Maligtas

¹³Mga kapatid na minamahal ng Panginoon, dapat kaming magpasalamat palagi sa Diyos dahil sa inyo. Kabilang kayo sa mga unang pinili niya^[d] upang pagkalooban ng kaligtasan sa pamamagitan ng Espiritu Santo at ng inyong pananalig sa katotohanan. ¹⁴Tinawag kayo ng Diyos sa pamamagitan ng Magandang Balita na ipinahayag namin sa inyo upang makasama kayo sa kaluwalhatian ng ating Panginoong Jesu-Cristo. ¹⁵Kaya nga, mga kapatid, magpakatatag kayo at panghawakan ninyo ang mga katuruang ipinasa namin sa inyo, sa pamamagitan man ng aming sinabi o isinulat.

¹⁶Aliwin nawa kayo ng ating Panginoong Jesu-Cristo mismo at ng ating Diyos Ama na umibig sa atin, at dahil sa kanyang kagandahang-loob ay nagbigay sa atin ng walang hanggang kaaliwan at magandang pag-asa. ¹⁷Bigyan nawa kayo ng matatag na kalooban para sa lahat ng mabuting gawa at salita.

Ipanalangin Ninyo Kami

³Mga kapatid, bilang pagtatapos, ipanalangin ninyo kami upang ang salita ng Panginoon ay mabilis na lumaganap at parangalan ng lahat, tulad ng ginawa ninyo. ²Idalangin din ninyong maligtas kami sa mga taong mapaminsala at masasama, sapagkat hindi lahat ay may pananampalataya sa Diyos.

³Ngunit tapat ang Panginoon; siya ang magpapatatag at mag-iingat sa inyo laban sa Masama. ⁴Dahil sa Panginoon, malaki ang aming pagtitiwala na sinusunod ninyo at patuloy na susundin ang mga itinuro namin sa inyo.

⁵Patnubayan nawa kayo ng Panginoon upang lalo ninyong maunawaan ang pag-ibig ng Diyos at ang katatagang nagmumula kay Cristo.

Babala Laban sa Katamaran

⁶Mga kapatid, iniuutos namin sa inyo sa pangalan ng Panginoong Jesu-Cristo na layuan ninyo ang

sinumang kapatid na tamad at ayaw sumunod sa mga turo na ibinigay namin sa inyo. ⁷ Alam naman ninyo na dapat ninyong tularan ang aming ginawa. Hindi kami naging tamad nang kami'y kasama pa ninyo. ⁸ Hindi kami nakikain kaninuman nang walang bayad. Nagtrabaho kami araw-gabi upang hindi makabigat kaninuman sa inyo. ⁹ Ginawa namin ito hindi dahil sa wala kaming karapatan sa inyong tulong, kundi upang kayo'y bigyan ng halimbawang dapat tularan. ¹⁰ Nang kami ay kasama pa ninyo, ito ang itinuro namin sa inyo, "Ang ayaw magtrabaho ay hindi dapat kumain."

¹¹ Binanggit namin ito dahil nabalitaan naming may ilan sa inyong ayaw magtrabaho, at walang inaatupag kundi ang makialam sa buhay ng may buhay. ¹² Sa pangalan ng Panginoong Jesu-Cristo, mahigpit naming iniutos sa mga taong ito na sila'y maghanapbuhay nang maayos at huwag umasa sa iba.

¹³ Mga kapatid, huwag kayong magsasawa sa paggawa ng mabuti. ¹⁴ Maaaring mayroon sa inyo diyan na hindi susunod sa sinasabi namin sa sulat na ito. Kung magkagayon, tandaan ninyo siya at huwag kayong makisama sa kanya, upang siya'y mapahiya. ¹⁵ Ngunit huwag naman ninyo siyang ituring na kaaway; sa halip, pagsabihan ninyo siya bilang kapwa mananampalataya.

Bendisyon

¹⁶ Ang Panginoon na pinagmumulan ng kapayapaan ang siya nawang magkaloob sa inyo ng kapayapaan sa lahat ng paraan at pagkakataon. Nawa'y sumainyong lahat ang Panginoon.

¹⁷ Ako mismong si Pablo ang sumusulat ng pagbating ito. Ito ang aking lagda sa lahat ng sulat ko. Ganito ako sumulat.

¹⁸ Sumainyo nawang lahat ang kagandahang-loob ng ating Panginoong Jesu-Cristo.

Multiple Choice:

1. Basahin ang 2 Tesalonica chapter 1. Alin sa mga sumusunod ang maling statement?
 - a. Pagdating ng Lord mula sa langit, kasama Niya ang nag-aapoy Niyang magigiting na mga anghel upang husgahan ang mga hindi kumikilala sa Diyos at tumatanggi sa mabuting balita ng Panginoong Jesus.
 - b. Ang parusa sa mga hindi mananampalataya ay walang hanggang paghihikahos at pagkahiwalay sa Diyos.
 - c. Mayroong pagkakataon na magsisi ang mga di-mananampalataya at tumanggap sa mabuting balita sa purgatorio.
 - d. All of the above
2. Basahin ang 2 Tesalonica chapter 2. Alin sa mga sumusunod ang tamang statement?
 - a. Ang Panginoon ay babalik upang ipunin at katagpuin ang Kanyang mga tupa.
 - b. Ang pagbabalik ng Panginoon ay hindi magaganap hanggang hindi nagkakaroon ng matinding paghihimagsik laban sa Diyos at hindi pa naihayag ang lalaking walang paggalang sa batas na magdedeklara na siya ay Diyos.
 - c. Ang lalaking walang paggalang sa batas ay gagawa ng mga huwad na kababalaghan at milagro ni Satanas at siya ay papaslangin ng Panginoon.

- d. Ang mga kademonyuhang gawain ay mananatili hanggang hindi inaalis ang kamay na nakapipigil sa mga ito.
 - e. All of the above
3. Ang naghihiwalay sa mga tupa ni Cristo ay ang kanilang paniniwala sa katotohanan tungkol kay Cristo, na taglay ng mabuting balita na nakapaloob sa salita ng Diyos. Ang pangungusap na ito ay:
- a. Tama
 - b. Mali
4. Ayon sa 2 Tesalonica 3, hiniling ni Apostol Pablo na sila ay ipag-pray. Alin sa mga sumusunod ang hindi kabilang dito?
- a. Na ang gospel ay lumaganap nang husto at igalang saan man ito makarating
 - b. Na iligtas sila sa mga masasamang loob at masasamang tao dahil hindi lahat ng tao ay mananampalataya.
 - c. Na dumami ang kanilang mga supporters at lumaki ang kanilang love gift
 - d. All of the above



© Revised September 20, 2023 Conrad Jun Tolosa

All rights reserved. No part of this material may be reproduced, stored in a retrieval system, or transmitted in any form or by any means except for brief quotations for the purpose of review or comments, without the prior permission of the publisher, Philippine Biblical Worldview Foundation, Inc.